


This is my language: i students dal Istitût "Magrini Marchetti" di Glemone intun progjet european su lis lenghis

Tes isulis Baleârs, il campus ECCA - European Charter Classroom Activities

Sul tacâ dal 2023 diversis scuelis Europeanis a àn partecipât a un concurs organizât te suaze dal progjet ECCA - European Charter Classroom Activities (Ativitâts in aule su la Cjarte europeane des lenghis regionâls o minoritariis). Aes studentis e ai students di vot regions cun lenghis di minorance, e tra chês il Friûl, ur è stât domandât: "Parcè la int varessie di visitâ la tô region linguistiche?".

I zovins selezionâts tant che autôrs des rispuestis plui creativis - dome vincjecuatri - a àn vude la oportunitât di partecipâ al campus ECCA e di "passâ i confins cu la proprie lenghe".

I students (tra i 14 e 17 agns) des vot regions linguistichis, graciis ae poie dai partners dal progjet ECCA, e fra chei la ARLeF - Agenzie regionâl pe lenghe furlane, a àn podût cussì celebrâ lis lôr lenghis e vivi esperiencis che a puartaran simpri tal cûr. Tes Isulis Baleârs, dulà che al è



I zovins che a àn partecipât al campus ECCA

stât fat il campus, a rapresentâ il Friûl a jerin Nicholas Forgiarini, Caterina Picco e Giorgia Giacobbi, dal Istitût "Magrini Marchetti" di Glemone, compagnâts de professore Nicoletta Bosa.

In plui che fâ escursions, partecipâ a un laboratori su la improvisazion teatrâl e celebrâ lis lenghis intune serade di musiche, une des ativitâts plui particolârs di cheste esperiencie e je stade chê di creâ un rap plurilengâl (furlan, galês, frison, magjâr, finlandês, catalan, basc e ladin). "This is my language" ("Cheste e je la mê lenghe") e je la cjançon regjistrade e produsude di une compagnie catalane locâl (@swingmallorca @andrewbflatvega). I participants al campus a àn ancje podût sperimentâ il gjornalisim mobil (MoJo): ogni rapresentance linguistiche e à scrit un articul li che e à contât ce che si varès di fâ pe proprie lenghe.

Il progjet ECCA, cofinanziât dal NPLD - Network to Promote Linguistic Diversity, rêt paneuropeane cun sede a Bruxelles che e lavore tal cjamp des politicis linguistichis, al è nassût tal 2019 cul obietîf di svilupâ un percors didatic che al aprofondis i ponts de Cjarte europeane des lenghis regionâls o minoritariis.

SCACS: si imparin a scuele, par furlan

Imparâ i scacs e, zuiant, imparâ une lenghe. Al è chest l'obietîf di un progjet de scuele di scacs Vera Menchik, sostignût de ARLeF, che al è rivât insom cu la stampe dal libri "SCACS. Dutis lis regulis dal zûc (e alc di plui)". Un strument gnûf che al sclaris il movisi armoniôs, e cualchi volte avventurôs, dai tocs, intes sessantecuari cjasis de scachiere, e che al vûl testemoneâ cemût che une lenghe minoritarie e puedi cjatâ il so puest intune forme di comunicazion gnove, ma tal stes timp antighe.

Il libri al è stât presentât di pôc in ocasion dai Campionâts talians di scacs dai Zovins, che a son stâts fats a Tarvis. A son intervignûts i rapresentants plui impuartants de Federazion scachistiche taliane, il diretôr de ARLeF, William Cislino, e Vanni Tissino, responsabil de Vera Menchik.

Il binomi furlan-scacs al ufrîs ai fruts une vore di vantaçs: la educazion plurilengâl, cemût che e dimostre la ricercje scientifiche, e puarte ai frutins beneficis cognitîfs, sociâi e culturâi. Introdusi il zûc dai scacs vie pe etât evolutive al jude fruts e fantats a passâ tapis fundamentâls intal svilup dal cerviel, de personalitât e dal compartament. Propit su la fonde di cheste premesse impuartante, al è stât definît il progjet che, pe prime volte in Italie, al fâs in maniere che une lenghe minoritarie, il furlan, e sedi doprade intes scuelis par insegnâ il zûc antic e nobile dai scacs.